

温州市图书馆 编
沈洪保 整理

林駿日記

下

閏日報

初二日辛巳大晴以相樽桐樞諸兒往文廟謁聖遂
至李蘊齋王右禪菊麗生諸中表處賀歲博文表徑
來晤宵閏日報

初一日辛巳

周韶仙之網攜其子毓樞來

中華書局

温州市图书馆编 沈洪保整理

林駿日記

下

中国近代人物日记丛书

中华书局

光绪二十九年(1903)^①

正 月

元日丁巳

晨雨。焚香,开卷诵《经世文编》《论学书》,遂伸纸试笔,课枏、枓、桐三儿读书。午刻,往竹崖公祠祭祖享馐,是年寿星叔家值祭。申后,大雪漫天飞舞,如散鬢女之花矣。成七言一律。宵,阅《中外日报》。

元日纪雪

今朝新酒进屠苏,景物依然壮帝都。中亚初开文治界,蔡州谁补凯旋图? 苍茫人世皆尘劫,鼓铸乾坤作冶炉。爱国精神摩热力,书生夙愿抱区区。

初二日戊午 终日大雨

阅《中外日报》。李彬臣表兄来贺年。宵,阅报章。

初三日己未 阴

李云苓表弟来贺年。余往诸舅氏家道贺。宵,阅《中外日报》。

^① 原稿题识曰:“颇宜茨室日记六册,筱竹遗墨,光绪廿八年壬寅正月只一叶,馀佚。廿九年癸卯正月之十二月十二止。”“颇宜茨室日记癸卯。”按:底本此一叶已至光绪二十八年开头。又,底本光绪三十年部分止于十二月十二,但另夹有红格纸,十二日至三十日均齐,现遂录于后。

初四日庚申 天色沉阴,冻云不解

内子生日。李蕴斋、陈云卿二中表,玉锵内侄,许德寯、叶耕经二门人均来贺年。午后,邀陈粹琳持名片到各友处道贺。□往诸亲戚家拜谒,闻家和叔调梅耗音,不禁为之惋惜。宵,排设香案接拜诸神,而天公又玉戏矣。阅《中外日报》。

哭家和叔茂材调梅^①

初五日辛酉 天色沉寒,微雪

看后园梅花盛开,折数枝置胆瓶中,颇觉香气袭人。成七古一章、七言一律。吴伯屏、叶奇勋、刘祝尧表叔来贺年。午刻,李云苓表弟来邀饮圆真酒,管杏浦、丹三亦在。饮罢,偕杏浦登西岷山阁一游。但见隔岸青山,被残雪妆点,罨画可爱,近暮下山。宵初,在李玉君家饮。

后园有梅一本为旧时所手植今岁花开颇盛作诗志喜

去年荷锄翻新土,移种梅花在春圃。今年消受春风多,千
花万花不可数。寒香阵阵化作云,碎琼缀处绿苔补。一株玉树
透芳春,栖巢何必招翠羽。根老盘螭石齿新,蜜蜂粉蝶时飞舞。
我家梅鹤本清高,逋仙旧为孤山主。但愿拓地种万株,结庐坐
隐忘今古。

折梅数枝,置诸胆瓶,习静小坐,时觉清香袭人,有触于心,
率成七言一律

南枝花放占春先,供养铜瓶结静缘。未许蒲团临佛界,如
逢秋院□僧禅。化成明月三人影,分得寒池一勺泉。别有乾坤
藏斗室,清闲也愿学神仙。

① 底本此下留空六行,未录悼念诗文。

初六日壬戌 快晴,严霜铺天,池水成冰

朝,伍宝滋表弟来拜年,相与看迎春邑俗。先一日,县主暨粮捕二厅坐銮舆,排全副仪仗,装芒神、春牛出东郭,至周湖插春田,始进城回署,设春酒于县堂,招梨园子弟演剧,此亦古人先立春三日,迎春于东郊行庆施惠之意也。夕,郑一山偕其门人友龙、许宝箴来邀,同登城一眺。宵,阅《中外日报》。

初七日癸亥 晴,瓦霜颇厚,莲缸之水成薄冰矣

登集云、万松二山,谒先人墓,枌、杼二儿随行。日晡始归。宵,阅《中外日报》。

初八日甲子 晴,霜花点瓦,一望如银

辰刻立春。烧樟叶、饮春茶。巳刻,同赵羽仪妹丈、李玉君表弟、钟文表侄乘舟往丁田张子震轩处拜年。近午抵其家,时周鹿峰表兄、门人孙公侠先在焉。夕,聚谈半日。宵,黄穰卿、张翼臣、家洲髓均来过访。看迎灯,较去年颇觉华艳,惟乡人扛神驰骤自如,嫌近轻褻,未能脱俗耳。更阑,与公侠同榻而眠。

初九日乙丑 晴

叶奇颇自城来。震轩作代表人,孙公侠作发起人,登台演解缠之说。黄穰卿、家洲髓均在焉。愚民无知,误为西人传教,颇作不入耳之谈,遂略说数课而止。午后,公侠乘舟回里。宵,前林族人晋三招饮,在坐者家鉴亭丈、李君琴轩。席散,往太阴宫观剧,遇赵羽仪。天色阴翳,疏雨数点,遂返。

初十日丙寅 晴

朝,同前林族人坐谈半日。夕,驾棹偕李玉君、钟文叔侄过仙峡周鹿峰表兄处拜年。羽仪舫舟以待。辞别归家,已更阑矣。

十一日丁卯 晴定气正

朝,阅《中外日报》。夕,李玉君表弟谒先人墓,邀余同往。是日

偕行者蕴斋表兄及其子博文也。宵倦，伏枕颇早。至四鼓，闻人声哄然，披衣而起，启户视之，红光冲天，火挟风势，风助火威，如飞龙乱滚，在半空中。余遂出门一探，虽杨宅坦地属隔河，而东北风大起，恐被延烧，即时邀李丽生表弟来，预为之防，以祖母遗柩犹停在堂也。阅数时始扑灭，乃交相庆曰：“今夕之险，得免于难，幸矣哉！”闻被灾者计廿七家，邵棠甫师、杨小村均受厄，毙于火者一妇二稚女，验其尸迹，相抱就死，盖系一家之母女也。噫！可怜已。

十二日戊辰 阴，细雨

招邵司务作新衣。宵，阅《中外日报》。

十三日己巳 雨

阅《中外日报》。访王玉卿，知其徒蔡紫生近日困于赌博，屡战屡败，避债无台，遂托天台之游以绝迹。但余家礼房公事托诸玉卿，而玉卿又托诸紫生，特恐蔡君一去，无人照顾，心为担忧。王玉卿曰：“仆为子代择之，决不致误。”遂谢之。薄暮，李彬臣表兄来，相与谒棠甫师，慰藉一番而出。是夜月色明亮。

十四日庚午 阴晴不定

早辰，步行往丁田，时震轩妹丈在郡未归。夕，雇舟同秀莲甥女返。宵，写祭忠烈武毅侯寿诞祝文。

十五日辛未 细雨，气温风暖

早晨，遣仆到周湖庙候官僚致祭武毅侯。阅《中外日报》。夕，往明伦堂听演说，主讲者孙中容刑部，陈志三、介石二孝廉，萧亦陶，计第三次开会也。宵，往陶尖庙观剧。

十六日壬申 气寒风燥，欲霁

朝，阅《中外日报》。夕，前林族人来谈。宵，往陶尖庙观剧。

十七日癸酉 晴定气寒

张震轩妹丈来贺年。宵，李云苓表弟招轩兄饮，余亦同往，包君

筱亭、鹤坡舅氏均在座。

十八日甲戌 晴定气寒

午刻,李玉君表弟招轩兄饮,余偕往焉。夕,鹤坡舅氏过谈。宵,张震轩妹丈在丽生家饮酒,在座者三舅父暨诸中表。席散,往陶尖庙观剧。

十九日乙亥 雨数点即止

卓午,赵羽仪妹丈招轩兄饮,余携村儿往焉。鹤坡舅氏过舍,坐谈至暮。宵,邀玉君、羽仪、轩兄同饮,席散,钟已十一下矣。

二十日丙子 雨静天霁

晨刻,西北蒙学开馆,教习八位,学徒共九十六人。左堂掌教彭蓉仙境明,右堂掌教项志贞廷珍,东斋分教管杏浦瞻洛、周榴仙之纲、眉仙之冕,西斋分教彭耀卿乙晖、薛仲渠达及余焉。是日,教课未定,惟引圣经中物格一节以开讲耳。薄暮,震轩妹丈返舟,不及送别。宵,饮开馆酒,设共三席。

廿一日丁丑 晴

为休息之期,本堂规约,每值丁日,早晨谒圣后,即为诸生散学,以便休沐,吴君伯屏之意也。夕,在家,阅《中外日报》。宵,在姜岳仙家,偕饶颐真、周眉仙酌议教科,或归班,或分门,尚难成议。

廿二日戊寅 晴,气寒

到堂,暂分甲乙丙三班。甲三人:项棣生、虞廷光、贾郁文;乙六人:徐自元、蔡作醴、陈兆新、张保仁、鲍桂芳、郑翊周;丙五人:郑文登、郑庆尧、李庆浏、顾宝善、张佑仁。甲乙二班,史学均课普通新历史;丙班课史略舆地学。甲乙则以地理问答课之;丙则课以教经问答。余所分教,计一十四人。丁戊己三班,归之耀卿、仲渠二君。左斋分教班次亦同,东西堂又不相上下矣。宵初,访郑一山。前林族

人学献、培吉来。黄君小腴过谈。

廿三日己卯 阴。寅时雨水

暂分史学、舆地二门，作为教课。宵，邀叶味兰作控劣衿吉扬盗卖养贤众田呈词，因受前林族人之嘱也。亥刻，闻剥啄声，李子琳表弟来报，鹤坡舅氏陡患痰喘，此刻作古矣。闻之骇然。即随萱堂到其家一问，擎灯照处，但见面色如生，举手扪之，心胸犹温，兀立良久，不胜哀恸。噫！饮酒同筵，造庐坐话，相隔仅一二日，而遽为羽化，老人垂暮，风烛堪悲。光阴过客，转瞬成空，梦幻泡影，人生当作如是观耳。至漏四下始归。

廿四日庚辰 阴

到堂授课。宵，在李彬臣表兄家，同震轩妹丈，鹿峰表兄，管杏浦、丹三昆仲，为舅父送殓，选定子时盖棺。迨归家就枕，荒鸡唱曙。

廿五日辛巳 晴定

到堂授课。张震轩妹丈返丁田。门人孙季芄有游学日本之行，明日启程，亲来辞别，不及遇。宵，吴伯屏过谈，偕往薛玉坡家，与饶颐真、薛仲渠斟酌教课，洪小芸后至，未有定义。

廿六日壬午 晴定

先君忌日。到堂课徒，温积熟。薄暮，往丽生表弟家省母。宵，设饌祭先府君。叶味兰来，代前林族人顺高作控吉扬、富纯盗卖众产呈词，至二鼓去。

廿七日癸未 阴

到堂授课。宵，前林族人学献来，托渠袖前日二件呈词，交震轩妹丈一酌。

廿八日甲申 阴，天气温暖

到堂授课。午刻，为舅氏三日大殓之期，往其家一拜。夕，前林

人备呈投县,托叶君味兰周旋。宵,在李彬臣表兄家饮设奠酒,席散,漏三下矣。

廿九日乙酉 晴未定,气温四十二分,潮湿。午后南风

到堂授课。宵,过李丽生表弟家一谈,彬臣为其夫人周氏患虚弱之症,十分沉重,邀羽士备酒果告天,至其家随班代为祈祷。洋钟十二下,始携篝灯而归。

二 月

朔日丙戌 晴旋阴

朝,到堂课诸生。默书;问封建时代、郡县时代;问伏羲、神农、黄帝之世有何制作;问夏禹至桀计若干世,自兴至亡,计若干年,中间僭位者何人,共几年。项棣生答语颇见心思:僭位一节,谓羿闰位八年,与寒浞杀羿弑相中间,僭越者共计三十一年,何则?羿僭位八岁,普通新历史已载之矣,不必赘述。浞杀羿僭居君位数十年,盖从少康生二十九岁,而夏遗臣靡始兴师灭浞,复禹旧迹,少康践帝位,夏道再兴,以二十九岁,合浞诛羿后僭越数岁,自鄙意揣之,知三十一年无疑。余颌之,嘉其读书得间已。夕,明伦堂开会演说,主讲者萧亦陶侃、陈雪岚国琳、家洲髓文潜、养素□□、孙延曙公权、饶颐真方猷,计第四次开会也。四隅蒙养学堂暨速成学堂,教习各率诸生来听讲。薄暮,散会。又到文庙看习丙。宵,写祭文昌帝颁胙肉票。是夜丁祭,余派崇圣祠引赞执事,倦睡不赴。^①

初二日丁亥 细雨

晨,到文庙领胙肉。入学堂,率诸生谒圣后,散学休息。闻周氏

^① 底本“倦睡不赴”下,留空白一大段,似作补抄之用。

表嫂耗音。前林阿木来，写函递震轩妹丈。是夜五鼓，官僚公祭文昌君。同国琳表弟上西岷山阁，排列豆品。林皞农大令福熙到庙最晏。

初三日戊子 晴，天气稍寒，风燥

晨，过李彬臣表兄家一啣，而嫂夫人周氏已寄木矣。巳刻，到堂。卓午，为舅氏七日来复之期，袖素衣拜奠。宵，在彬臣处，周筱苓、幼仙昆仲在焉。是夜丑时，周氏表嫂大殓，与诸中表送之。

初四日己丑 晴，气寒

到堂补论一课。震轩妹丈来。宵，作道课甄别，成三艺，至天明。论题，《肃宗即位灵武论》。策题，《泰西各国雄视全球，以兵战则兵强，以商战则商富，以艺战则艺精，中国近来极力维新，事事仿照西法，将来进步，可以抵制泰西否？》四书义题。《来百工也，柔远人也》。

初五日庚寅 细雨，湿气蒸郁

访郑一山，托抄道课卷寄郡汇缴。吴伯屏送到《新世界学报》第八册。到堂，甲课题，《伊尹放太甲于桐论》。乙课题。《孝亲说》。申刻，陈见初画士过访。宵，过李丽生表弟家。

初六日辛卯 晨晴，复阴，气温地湿

到堂授课。萱堂携二甥女往赵羽仪妹丈家。宵，倦甚。余近日身患肝热，投下北沙参、麦冬等药。

初七日壬辰 雨，气寒

到堂授课。午刻，往赵湖洲云发把戎家饮寿酒，馆课暂托之薛君仲渠，出课题。甲《强存弱亡论》；乙《戒惰说》；丙《拼父子君臣四字》。宵，改诸生卷。此课大有进步，就枕少憩，漏声五下。

初八日癸巳 雨，气寒

到诸生家一问，始入塾散课卷。卓午，访王玉卿不值。过云苓

表弟家,邀留午饭。夕,闻雷。前林族人来说,为盗卖众产之事,本日酉牌集讯矣。宵,在县署,同羽仪妹丈从旁观之,原被告有张懋衍、林吉扬、林富纯、林顺高、林炳槐等共十余人。先时质问衍及扬,后问顺高与槐,无如族人野愚成性,言语戇直,不若扬、衍之巧言如簧也。既而顺、吉到公庭剖白明晰,林噪农大令爰将养贤田亩断归众产,张姓原买田价嘱吉扬缴还,不得复生枝节,两造各为具结,特作罢论。惟富崇系积案地棍,准予呈请提办。噫!若林大令者,鞠情之下,不啻洞若观火,非惟吾族之幸,抑亦阖邑士民之幸也。夜半归,写春祭关帝胙肉票。

初九日甲午 雨,气寒。丑时惊蛰

在堂授课。叶味兰来访,酌定讯费鹰洋十四圆。宵,写祭武帝祝文。是夜,祀关圣。邀国琳表弟到庙陈设豆品。

初十日乙未 朝雨,旋止,有欲霁意,夕阴而复雨

到堂授课。是日,三舅氏二七之期,管君杏浦、丹三备酒醴拜奠,余作赞襄,读哀词,计一千馀字。仍到馆。甲,课题,《问管叔、周公均兄弟也,而周公杀管叔何欤?》、乙、丙,拼文。宵,过李外舅家,与岳母坐谈良久。

十一日丙申 阴,云绵不散

到堂,温积熟课。甲史学,问:五帝之代夷狄之国何名?征之者何帝?问:帝尧、帝舜,夏、禹、商、汤,周文、武,其先世之祖为谁?问:春秋之世,强者共若干国?其国何名?试历指之。问:周宣王中兴征伐共若干国?奉征讨之命者其臣何名?共几人?乙问:虞、夏二帝巡狩至于何地?崩在何方?问:桀纣之世,或杀或囚之忠臣何人?所嬖者何女?夏与殷自兴至亡计若干世?共若干年?试详言之。丙问:造字制算,及占风日星月者何人?试历指之。问:伏羲、神农、黄

帝之代,有何制作?甲、乙舆地,问:五岳、五湖总称何名?所属何省何府?试分言之。问:万里长城筑于何人?所经之地何名?共几省?计若干里?其上下高阔若何?丙问:全球中大洋有五,其名若何?所属何方?问:亚洲全境长广共若干方里?

十二日丁酉

朝阴。丁期谒圣休息。午后,鸣钟一下,电光穿牖,闻雷数声。阅《中外日报》。宵,过李云苓表弟处一谈。

十三日戊戌 朝阴云不散,雨势连绵,至夕稍开霁色

到堂授课。甲乙二班,增日记一课。宵初,同叶味兰在县署,看人投递,我族人之呈词亦与焉。讯四都盗窃一案,民人陈正兴控碎山盗窃稻草,且以伊妻装病恫喝。林皞农大令以为此小事也,又同乡井,无须结讼,致伤和气,判断之下,颇见平允。二漏下归,阅《中外日报》。

十四日己亥 朝阴,夕快晴

到堂授课。写致斋三日榜,仲春祭文帝文。薄暮,甥女秀莲暨三妹,自羽仪妹丈家归。宵,写颁胙票。

十五日庚子 雨

在堂授课。午刻,张震轩妹丈来,备轴仪送舅家。饶颐真、薛玉坡二君率甲班诸生到明伦堂听演说,计开第五会也。余不去。宵,访吴伯屏,谈及分教习课徒疲玩,恐招人讥,将欲设法改良也。至二漏始归。夜深,雷雨颇大,各官僚致祭文帝,邀国琳表弟为余代庖。

十六日辛丑

本庙设醮左右堂,假霁色忽开气温。午前大晴,左右两斋,授课如昨日。宵,作祭鹤坡舅氏文。

附录祭李鹤坡舅氏文

岁在癸卯月正下浣三日，我舅氏鹤坡李公捐馆舍。越二月壬寅日为来复三周之期，外甥林骏率子外孙煥耕、煥得、煥桐、煥樛、煥枳等敬奉清香一瓣，鲁酒一卮，媵以椒荔，致奠于舅父之灵。乃为文以告之曰：

夫人之死，有若泰山之重，鸿毛之轻，或以夭死，或以寿终，均之死也。而以轻较重，以夭例寿，固迥乎不同。死而成名，犹之不死。使生而无名，虽生犹死也。若公之没，盖卓卓为人所称羨者矣。公生而孝悌，于家庭则伯叔兄弟无闲言，尤好赠遗；于亲戚友朋常联之以信。以早失乾荫，家政丛杂，因弃儒服贾，讲周官理财之学，师管子，法陶朱，经营之善，货财之殖，盖有追步古人者，故公起家时，先德遗产惟近中人，今则不啻增数倍矣。于是作室而新是谋，为翼燕之贻，高兹门第，而我中表彬臣、云苓、丽生三昆仲，均得藉公之荫，继厥家声。虽然，此皆公事业之显见者，而平生之隐衷，有非外人所知，而为骏所独喻者，不敢不表襮之以为当世告焉。今夫为一家计，见犹小也；为一国与天下计，则见大矣。庚子之乱，北京沦陷，内廷府库一扫而空，加以赔费数巨，政府诸公，补救憾无奇策，勉创各捐名目，以济国用，不知捐输为一时权宜计，非万全策也。欲富其国，不得不整顿商务。中国商政日坏，十商九私，于是西商得利颇巨，而华商落下乘矣。公每与骏言及此，即不胜扼腕咨嗟，隐若自憾屈身市井，不能为今日刘晏，撑拄危局。此则公之苦心也。近数年来，骏家购阅邸钞，每值轮船到日，公必欣然造庐问讯。骏若言直省近无滋乱，公即心喜，否则将蹙頞不自安。以公半生历练，溷迹市尘，未受朝廷一官一职，而有心爱国，无异居官者然。

忠孝本非两事，公之涵养，殆有根于天性者乎？呜呼！以茫茫无极之世界，视我亚洲，犬羊环伺，死亡无有已时，黄种之不若，文明之未开。公也处此，手既无寸尺柄，一为挽回，坐视□衰，徒深悲悯，与其随波逐流，无所表见，曷若漆园□□□大化以安身？大陆将沉，瓜分在迩，念二十周之世纪□□，□耶命耶，生来死往，公能毋默运诸心，而去住分明耶！□□门庭见背，历一十九年，堂北春萱，只成独秀，自叹守株如□，无志四方，食指日繁，恒虞不给。公知我心，每一遇之，勗以理财之道，凡富家富国，非徒示以勤俭，善为生聚教训，即为致富第一义矣。而今已矣。公言在耳，其敢忘诸？人哭其私，而增之恻。骏则不屑也。来复三周，日月云迈。公灵如在，尚鉴兹哉！谨告。^①

十七日壬寅 雨息，阴

到堂授课。午刻，抄祭文。震轩妹丈来，为舅氏来复三周之期，同备酒醴合祭之。留饮，在坐者蒋中笙、管子儒、仲凌、胡小蓉、李玉君、震轩及余也。是日上午，温积熟课。甲史学，问：春秋之世，戎狄之著名者所居何州？共有几国？问：吴伐越，越伐吴，败于何地，今之地何名？问：齐晋之国，为其臣所夺，其臣何人，所属何姓？问：战国以来，至秦一统，共几年？问：齐桓公功业若何？乙问：古公避何国之患，迁地何方，今属何地？问：周文武之都何名，武王破纣其地何属？问：五服之名若何？齐鲁之国何地，今名若何？问：五等之爵若何？丙问：夏禹所分之九州何名，今之州名若何？舆地，问：杭州海湾外之海岛何名？问：十八省之东南何岛？问：河何以名黄？其长约共几里？问：江何以取名黑龙？或地形相似，或水色相同，其命意取

^① 天头红笔批注：“纯用详人所略法，是文家变格，亦创格也。笔亦巽巽有古味。震轩。”

义之由，试一明之。下午，文课。甲练兵论；乙好打作与好读书得失论；丙耕读说。用“渔樵各乐何之乎”七字拼入。宵，往薛玉坡家，与饶君颐真谈颇久。

十八日癸卯 天气犹是，但雨息耳

到堂授课。宵，过李云苓家，与震轩妹丈谈，至三漏下始归。

十九日甲辰 雨息，阴，气寒风燥

到堂授课。午刻，张妹丈携甥女归丁田，大舅母同往。薄暮，过薛玉坡家一谈。宵，往岳丈家，遇余味兰、李友兰，坐话至更深。

二十日乙巳 雨势缠绵，阴云不振，犹如昨矣

到堂授课。宵初，同家梅仙、叶耕经往县署，观林皞农邑尊审断李陈二姓借钱之事。李为友樵内弟，陈为福澜，系开饭店阿三之子，因客腊陈向友樵讨旧款，计英洋二翼，遂至口角相争，两结成讼，首尾一载，缠扰不休。此日邀集讯结，陈反受辱。盖林大令下车伊始，陈曾投呈控父，久目为梟獍者，今适遇其巧，遂责之曰：“天下无不是之父母，父母何人敢为指控？待亲如此，待他人可知。躯壳虽属人形，心性实同禽兽。然禽兽犹不忘本，鸦能反哺，羊知跪乳，可以人而不如物乎？汝当痛改前非，事亲格外加意。本县则不责也。”又曰：“汝呈词多费解语，名为童生，实无殊于野鄙。读书既不成器，气焰反近乡绅，似此行为，正堪貽笑，而又不明讼则终凶之理。李忠厚人也，前盛令既断，还鹰洋三数，姑仍其旧可也。”噫！陈福澜以小事而缠讼不休，当庭质讯，旁观者多为官长，指为畜生，非徒今日貽为笑柄，即平时之不孝，直将一付行状，字字不磨矣。为人如此，有何益哉！

廿一日丙午 朝，天气放晴；夕，仍下雨

到堂温积熟。甲问：苏秦说合从之利，先历何国，其余六国所历先后若何？问：战国时，春秋之强国存者有几，其余有封土而弱甚者

计若干国？乙问：封微子、太公及周召在于何地，今之地何属？问：晋文之代，有何征伐事业？丙问：伏羲、神农、黄帝之代，其制若何？问：少昊、颛顼、帝喾之代，建国何地，都定何方？问：帝尧诞生共几月？问：夏传共几主，其年若干？问：太戊、武丁之相何名？问：盘庚所迁之都今属何省？文课：甲汤放桀论；乙赏罚公私论；丙禽兽说衣服犹毛之也。拚字成文，随笔改之，散卷，惟甲卷不及改。宵，继烛补之。过正龢信局，取来《日报》共四封。转过李芸苓家一谈。

廿二日丁未 西风送爽，大放晴光，心为一快

是日丁期演说，薛中渠竟与余相龃龉者，其原因由西堂项君志贞教下之生胡汉章，前日攫去课本一册，私卖与顾宝善之兄，志贞谓胡系世家子，姑隐忍之。而余分教之徒郑翊周所作日记，竟明指其事。余见之随和训斥，以杜排击之端。薛遂拂意，因此日演说，反以言訾余，并谓己无其权，且辞席去。噫！薛自大者也，气骄意傲，旁若无人，不自思身为教督，只掌起居，教课浅深，与彼无涉，彼侵我教课之权，反谓我夺彼之权，何其大相反背耶？矧薛君与余平日本无嫌隙，忽然藉此相诋，试问其居心属何等乎？中心不平，怫郁竟日，在堂推算功过簿，赖周眉仙、彭耀卿二君赞成之。叶奇顾遣人送到《新民丛报》第二十二、二十四，计二册。问来人孙季芄出门消息，说近日已到岛国矣。宵，在姜岳仙家，与饶颐真、周眉仙坐谈至三鼓。

廿三日戊申 大晴

到堂授课，胡汉章受训斥矣。余自思为薛仲渠所抑，且伊叔玉坡心有所拂，难乎为情，不得已作辞席之计矣。姜岳仙、管杏浦、周眉仙诸君力劝阻之，暂为之允。抄盗墓呈词投署。宵，过彬臣、芸苓二中表家坐谈，遇姜岳仙，至三鼓始归。

廿四日己酉 大晴，气平。寅时春分

到堂授课，丙钓鱼说。宵，阴，在李云苓表弟家，听僧诵经，至二

鼓归。是夜将晓,雷雨颇大。

廿五日庚戌 晴,但未定耳。午后,气温

终日到堂授课。宵,握管欲作玉尺官课,困倦异常,至四鼓始起,成论一篇。题《李邺侯舍陆宣公而荐窦参董晋以自代论》。

廿六日辛亥 气寒。朝,细雨如丝,连绵不绝,夕阴

终日到堂授课。是日增算学一课。宵,过郑一山处一谈。萱堂自舅家归。近日在蒙学堂课徒,功课纷繁,日不暇给,精神较去年减一半,每到黄昏,倦则思卧,老境将历,事业无成,奈何奈何!

廿七日壬子 雨丝连绵不绝

到堂授课,默积熟。甲问:智伯求赵何地? 郗疵对智伯何言? 问:襄子使何人见二子? 其言若何? 问:尹铎请简子之言如何? 问:襄子避难赴晋阳,其言如何? 乙秦破联合军约几国? 问:使连衡事秦者共几国? 问:周自武至赧,国祚若干年? 问:秦灭六国,当始皇何年,孰先孰后,试举以对。丙问:秦穆所举贤臣何人? 问:桀纣伐何国,所得美女其名,并为详之。问:亶父所生之子几人,其伯仲何名? 问:武王封先代爵谥若何? 问:周公所营之邑何名,今属何地? 文课:甲郗疵与豫让孰优论;乙武王伐纣论;丙种树说。宵,改文课,作玉尺官课,童题《四皓羽翼太子论》。

廿八日癸丑 阴,气平

到堂授课。宵,过郑一山家,知中东甄别课案刻已揭晓,余名亦入彀中。

廿九日甲寅 阴,气平

到堂授课。薄暮,细雨。宵,阅《中外日报》。

三十日乙卯 阴,气平

到堂授课。薄暮,孙中愷公子过访,余适出不值。宵,至其家一